

Parare Domino Plebem Perfectam

A lokisetse Morena Sechaba se phethehileng (Luka 1,17)

Moeletsi oa Basotho

www.moeletsiobasotho.co.ls

Tlohelang
ho supana



3

Makhotla a
khutlise seriti

5



O lahlehela
ke
M100,000.00

7



HA HO NGOAN'E MO- TLE AFRIKA BORO

8

www.moeletsiobasotho.co.ls



KETEKELO EA LILEMO TSE MAKHOLO A
MABELI SECHABA SA BASOTHO SE THEILOE

+266 28 350 466/
+266 6260 09 WhatsApp
newsroom@moeletsiobasotho.co.ls

#PARARE DOMINO PLEBEM PERFECTAM

MOELETSI

Re lebile kae hantle?

'Muso ka Lekala la Mesebetsi e Mehola le Lipalangoang le morerong oa ho tla hokela litereke tsohle tsa naha ka tsela ea letšoana, e le hore motho a tlohele ho potoloha empa a e-tla haufinyane. Ntle ho moo ho boetse ho tl'oa ntlafatsoa maliboho a mangata ho thusa Basotho ho tšelela Afrika Boroa ho etsa khoebo kapa ka mabaka a mang. Litaba tsena li monate haholo ho sechaba hobane e se e le nako e telele litsela li le likoti tse neng li baka likotsi nyene le bosiu. Ha joale ho se ho lokisitse litsela tse 'maloa 'me ho boetse ho ntse ho lokisoa tse ling. Tokiso ea litsela e thusa haholo kholisong ea moruo kaha hoo ho tla hohela batseteli 'moho le bahahlauli ho etela Lesotho. Ka hona ntlheng ena 'muso o sebelitse, o hloka ho opeloa liatla.

Ka lehlakoreng le leng, ho boetse ho na le taba e sa jeseng litheohelang e etsahallang Basotho ba phelang linaheng tse ling haholo Afrika Boroa. Taba ena hantle qalong e qalile kahar'a naha ka mona, moo litokomane tsa boitsebiso le libukana tsa ho eta e leng pharela. Basotho ba phelang linaheng tse ling ba tl'oa lelekoa kapa ho romeloa mahae hobane ba se na litokomane tse ba lumellang ho lula moo ka molao. Ho ba le litokomane tse joalo ba hloka tseo naha ea habo bona e sitoang ho ba etsesa tsona. Joale ba se ba lutse lejoe le motsu, ba hana leha tšintši e feta feela, ba hopola hore ke mapolesa.

'Mebuso ena e 'meli e leng oa Lesotho le Afrika Boroa ka matona a amaheng ba ile ba kopana ho tšohla litaba tse amang Basotho ba naheng ea boahelani. Hoa lokisoa hore ba tla fuoa nako e itseng ba sa leleko e le hore ba lokise litokomane tse hlokahalang, le hoja ho bonahala eka seo ha sea tsoela Basotho molemo oa letho. Hantle-ntle bothata bo hokae hore ho be le tharollo ea moshoelela tabeng ee? Ana ke hobane Afrika Boroa e sa rate Basotho ha ba lula naheng eo kapa Lesotho ka baetapele ba eona e hloleha ho phethahatsa tse hlokahalang?

Tsela eo batho ba hlokahalang ka eona matsatsing ana e hopotsa motho nakong ea seoa sa COVID-19, moo ho neng ho bolokoa batho ba fetang bohloko ka letsatsi. Ka bomalimabe lekhetlong lena mafu a teng ke a iketsetsoang kaboomo, kaha ho bolaoa batho. Ke 'nete hore ntho e ntle e khopisa motho ea etsang bobele, hobane kamehla ha e bona kapa a bona motho ea e etsang o tloa ke khalefo. Ha se khale ke haufi mona ha ho etsoa molao khahlanong le 'Mino oa Famo hobane ho thoe beng ba ona ba baka tsitsipano ka ho lula ba bolaeana.

Joale sebini sa 'mino ona ka ho ho baballa talenta ea hae le tsa ba bang, o leka ho khutlisa seriti ka ho tsetsela tšoarellano le kopano lipakeng tsa bona. Moo a leng mothating oa ho etsa tsena tsohle o se bolaoa hobane o fetohe tse lekhotla la habo ka ho tsamaea le balireng. 'Mino oa Famo ka lebaka la ho liphetoho o qeteletse o fetohele setso sa rona, hoo re seng re ikotla sefuba ka ona machabeng. Ha e le moo beng ba ona ba sa o sireletse ka ho bopa khotso ekaba re tla ithorisa ka'ng?

E khahlametsa bo-rakhoebo

Tšelisano Thakholi

Hlooho ea Khoebo ea Banka ea Standard Lesotho, Monghali Keketso Makara o re ho khahloa ha lihlahisoa tse ncha tsa lichelete tsa khoebo, ke mosebetsi oa khoebo o reretsoeng ho atolosa menyetla ea likhoebo tse nyenyane, tse ma-

kaha e tliil'oa thusa haholo-holo bo-rakhoebo ba Lesotho ba likhoebong le libankeng tsa khoebo. A supa hore ka lihlahisoa tsena ke moo ba tliil'oa sebeletsa likhoebo tsohle tse phethang karolo ea bohlokoa haholo moruong oa bona e le banka hobane ke tsona khubu ea phepelo ea lihlahisoa le litšebeliso naheng ena. "Hape li phetha karolo ea bohlokoa e le bahiri ba Basotho ba

qeta bosiu re sa robale re nahana hore na re ka etsang hore khoebo e be bonolo, ho bareki ba rona le hore Standard Lesotho Bank e ka eketsa boleng ho bareki ba eona ba khoebo joang le ho holisa moruo oa naha." O boletse joalo a bile a phethela ka hore lihlahisoa tsena tse ncha li tliil'oa thusa ka tsela e khethehileng bo-rakhoebo ba Lesotho ba likhoebong le libankeng tsa khoebo.



hareng hammoho le likhoebo tse sebitsang kahare ho Naha ea Lesotho. O buile tsena 'mokeneng oa baphatlalatsi ba litaba o bileng Ntlo-Kholo ea Standard Lesotho Bank, Maseru ka la 24 Phupu monongoa.

O boletse baphatlalatsi ba litaba hore khakolo ena e bohlokoa

phelisang malapa naha ka bophara." O boletse joalo.

A bontša hore bona e le banka e eteleletseng pele bo-rakhoebo ba Lesotho, ba natefelloa ke phephetso ea ho kena libakeng tseo ba sa li tsebeng e le ho fumana tharollo ea mathata ao khoebo ea bona e tobaneng le ona.

"Ke tlameha ho tiisa mona hore e hlile re

Mookameli e Moholo oa Standard Lesotho Bank, Monghali Anton Nicolaisen o thoholelitse le ho leboha e mong oa bahoebi ba khoebo ea TP Techology, Mofumahali Lerato Sekolopata eo banka e ileng ea mo thusa ho kenya letsoho kholong ea eona ka ho mo alima chelete e kaalo ka M1Millione. A re o leboha haholo h'a ile a tšepa hore banka ea habo e ka mo thusa ho atlehisa khoebo ea hae.

Athe Mofumahali Sekolopata le eena o lebohile litšebeliso tse mofuthu tseo a ileng a li fuoa ke banka. A khothaletsa bahoebi ba bang ho tla fumana litšebeliso tsena tse ncha tseo morero oa banka e leng ho holisa likhoebo tsa Basotho.



'Muso o hokela litereke

Nthabeleng Seithleko

Letona la Lipalangang le Mesebetsi e Mholo Mohlomphehi Matjato Moteane, o re ba ikemiselitse ho matlafatsa khokelo ea litsela ka maloting le literopong molemong oa ntlafalo ea moruo oa naha le khoebo e tsamaeang ha bobebe. Tsena li hlaheletse polelong ea hae, ka la 23 Phupu monongoaha.

O supile hore Letona la Lichelete le Ntšetsopele ea Meralo Dr. Retšelisitsoe Matlanyane, o tekenne tumellano ea kalimo ea chelete le Banka e Kholo ea Lefatše e tl'o thusa ho tšehetsa morero oa mahaba libaka tsa maloti a Lesotho.

O re morero ona o tla shebana le ho ntlafatsa khokahano ea tsela ea letšoana



e kopanyang Katse le Thaba-Tseka, tokiso ea likarolo tse khethehileng tsa tsela e tlohang Maseru le Hlotse Seterekeng sa Leribe, le ho ntlafatsa maliboho a Maseru, Maputsoe le Qacha 's

Nek. H'a tsoelapele o re o tla boela o ntlafatsa tsamaiso ea thepa ho ea naheng ea boahelani le likepeng hore e fihle libakeng tseling ka nako. A re mahaba libaka tsa maloti a Lesotho

e lebeletsoe ho nka lilemo tse hlano, 'me o tla qala ka khoeli ea Phato selemong se holimo ho isa Phupjane 2029.

O itse o tlo etsoa ka mekhahlelo 'me oa pele o

hakanyetsoa ho chelate e kaalo ka M60Millione, o lebeletsoeng ho fetola khokahanyo ea libaka ka ho nyolella tsela Katse le Thaba-Tseka ho tsela ea letšoana e bolele ba 55KM. A re e tla phetheloa tlasa botsamaisi ba lefapha la litsela ka tataiso ea litsebi, ho boele ho ntlafatsoe maliboho a Maseru, Butha-Buthe.

O itse mokhahlelo oa bobeli o tla kena tšebetsong ka Lekala la Likhoebo e le ho potlakisa le ho matlafatsa khoebo le naha ea boahelani, le ho fana ka thuto ho makala a tl'o sebetsana le mokhahlelo ona.

A re ba tla fana ka thuto ea mahlale le thuto ho makala a amehang, le litsebi li tla tlatsetsoa ka litsebo tse hlokaalang ho matlafatsa khoebo, le ho bona hore mekonteraka e etsa mosebetsi ka tsela e nepahetseng. Haele mekonteraka eona e tla qala ho sebetsa ka khoeli ea Motšeanong isao, ebe litsebi li qala ka khoeli ea Pulungoana monongoaha. A khothaletsa lipuisano le batho bohle ho nolofatsa katoloso ea moruo naha ka bophara.

Puisanong le e mong oa bahoebi Thaba-Tseka Mohau 'Musi, o supile hore e bang 'muso o ka phethahatsa tšebetso ena joalokaha o hlalosa ho tla ba thusa haholo, kaha ba tla tseba ho lata lithepa naheng ea boahelani ha bonolo. A re ha ho na lebaka la hore ebe motho ha hloka ho ea Afrika Boroa o tla Maseru.

O re le baeti ba sebetsang Natala ba tl'o nolofalloa ke maeto, hape ha litereke li ka hokeloa 'moho hoo ho tla thusa hore moruo oa naha o bonahale o sebetsahala hantle. A re o lumela hore ho tla etsoa likeiti tseo ho lefshoang hore ho hokeloe litereke e le hore chelete e tsebe ho bokelloa ha bonolo.

O thoholelitse 'Muso oa Lesotho ka likhato tseo o li nkileng hobane taba ena e tl'o thusa hore batho ba fihle litšebeletsong ha bonolo, kaha ba bang ba nka maeto a malelele ho fihla litšebeletsong.

Maparamente tlohelang ho supana-Sekhamane

Nthabeleng Seithleko

Motsamaisi oa Lipuisano Paramenteng Mohlomphehi Tlohang Sekhamane, o re maparamente ha lokele ho supana ka menoana empa a tle ka tharollo litabeng tsa lipolao tsa batho kaha ba filoe matla ke molao. Tsena li hlaheletse tulong ea para-

mente, ea kamor'a phomolo ea Mariha ea la 22 Phupu monongoaha.

O re hore ba bokolle joaloka sechaba ke ntho e sa kahlising hobane ba tlameha ho sebetsa ka thata hore tharollo ea moshoelella e fihleloe litabeng tsena. O re lipolao tse tjametseng naha ena ke kobo-anela eo ba lokelang ho sireletsa sechaba, liketsahalang tse se behileng tlokotsing e kholo.

A re o tla khothaletsa Letona la Sepolesa, Borena le tsa Lehae, ho tla etsa polelo e khobang sechaba matšoafu kahara paramente. Boemong bona a kopa maparamente ohle ho thusa 'muso ho bona hore ba hlola mathata ana.

Ka lehlakoreng le leng Thabo Maretlane, o supile hore kholumo-lumo ea lipolaeano e metsa sechaba, ka hoo ba lokela ho ema ka

maoto ho felisa taba ena, e etsang hore batho ba phele ba sosobantse lifahlelo, ba tšohile. A re ha joale ho se ho se bolokolohi kahar'a naha.

O itse ba tšoenyehile ke lipolao tsena tse felisang bophelo ba batho letsatsi le letsatsi, 'me taba ena e beha Naha ea Lesotho boemong bo bobbe machabeng, hoo e tla furalloa ke batseteli.

Mpobole eena o bontšitse hore e le basali kahar'a lipolotiki ba tsitsipane ke lipolao tsena tseo joale ho seng ho hlaseloa malapa. Ka hona a re 'muso o tle ka maano a hlakileng a ho thibela liketso tsena eseng o kenye letsoho ka ho halefisa karolo e 'ngoe ea sechaba.

A re ho felisoa ha 'Mino oa Famo ha ho phekole letho empa joale ho bonahala lipolaeano li ata ho feta. O re bothata boo eena a bo hlokomelang ke tlhokahalo ea mesebetsi kahar'a naha hoo batho ba seng ba utloisana bohloko nako le nako.



RE TŠEHETSA BACHA



Tšeliso Thakholi

Hara basali ba bangata ba ntseng ba le bacha haholo lilemong, bao e leng mehlala ho bacha litabeng tsa khoebo le ho iphelisa ka ho itšoarella ka matsoho, re ka qolla Mof. Selloane Motsamai ka kampani ea hae e bitsoang Leaps & Bounce Pty LTD, e etsang lihlahisoa tsa litlolo ka mefuta ea tsona, lisepe le ho fana ka lithupelo ho bacha le batho ba baholo, molemong oa ho iphelisa ka ho iqalla likhoebo tseo e leng tsa bona. Puisanong ea hae le koranta ka litaba tsa khoebo ea hae le ka bohlokoa ba ho ithehela likhoebo o li beha tjena:

U kene neng litabeng tsa khoebo, 'me u qalile kae?

Litaba tse na tsa khoebo ke li qalile lilemong tse 'maloa tse fetileng, empa ka selemo sa 2017 ke ha

ke theha kampani ena ea Leaps & Bounce PTY Ltd. Ka e ngolisa ka molao ka la 24 Mphalane 2018. Re bahlahisi ba litlolo le lisepe ka mefuta ea tsona. Re bile re fana ka lithupelo tsa mekhahlelo e meraro bakeng sa bacha ba ratang ho itšoarella ka matsoho ka morero oa ho iqalla likhoebo tsa bona.

Ke mekhahlelo efe ea lithupelo eo u buang ka eona?

Mokhahlelo oa pele oo re o etsang ke ho fana ka koetliso ea khoeli le khoeli ho bacha le batho ba baholo. Mokhahlelo oa bobeli ke moo re tsoang kahar'a liofisi re leba literekeng ho ea fana ka lithupelo. Athe oa ho qetela teng, ke moo re rupelang batho ba hloka e le hore le bona ba tsebe ho iphelisa. Mona moo re fanang ka lithupelo ha re shebe mangolo a motho bakeng sa lithupelo, empa re thusa motho e mong le e mong. Leha ho joalo ha motho a batla ho ba

morupeli ke hona moo re tla hloka mangolo a hae a lithuto tseo a li entseng.

Le fumana thepa ho kae bakeng sa ho etsa lihlahisoa?

Kahare ho kampani ea rona re na le Lefapha le bitsoang Afri Beauty e leng lona leo re etsang lihlahisoa tsa rona ka litlama tsa Basotho tse kahar'a naha. Re sebelisa

rosemary le lengana.

Liqholotso ke life tseo le kopanang le tsona?

Qholotso e kholo eo re kopanang le eona ke hore melao e sireletsang bahlahisi ba likhoebo tse etsang litlolo e bonahalang e ntse e le morao. Lihlahisoa tsa rona li lokela hore re thusoe hore li be maemong a machaba.

Bokamoso ba kampani

ke bo fe?

Nka rata ho bona lihlahisoa tsa rona li rekisoa kahare ho naha le kantle, haholo linaheng tse hole.

Molaetsa ua hau ho bacha ke ofe?

Bacha ba eme ka maoto ba itšoarele ka matsoho. Re butse mamati ba tle lithupelong ba tsebe ho iqalla likhoebo tsa bona.



Lefahla o bolaoa ka sethunya

Nthabeleng Seitlheko

MISA Lesotho e ntšitse phatlalatsa ea litaba e tsoelang ka mathe polao ea mottalehi oa litaba Se-ee-le-Moeeng sa MXXL, Pulane Macheli ea neng a tsebahala ka "Lefahla" ea neng a e-na le sebini sa 'Mino oa Famo Khopolo Kholuoe, ka la 20 Phupu monongoaha. Phatlalatsa ena e ntšitsoe ka la 23 Phupu monongoaha.

Litaba tsena li hlalosa li etsahetse kopanong ea bona Masowe, Maseru, moo bobeli bo bileng ba feloa ke bophelo hona sebakeng sa ketsahalo, 'me bona ke baahi ba Thabana-Morena, Mafeteng.

Macheli o hlalile ka selemo sa 1990, Marallaneng, o qalile leeto la hae la bophatlalatsi ba litaba Mafeteng Community Radio ka selemo sa 2017, a fetela Radio Maria ka selemo sa 2018, o boetse a sebetsa Se-ee-le-Moeeng sa 357FM a etsa lenaneo la Re Khotla Mariba ho tloha ka selemo sa 2020 ho fihlela ka Motšeanong monongoaha, 'me lefu le mo khaoletsa a se a sebetsa MXXL. O suptja e le seboholi sa pele sa



ho mema Khopolo lenaneong, ho tla buisana ka bongoe le ho bopa khotso ho libini tsa famo.

MISA e re ho bolaoa ka sethunya ha hae ho ba tsoelitse maqeba, kaha ka la 12 Motšeanong ngoahola, ho ile ha thunngoa Ralikonelo Joki eo e neng e le seboholi sa Tšenolo FM ke batho ba sa tsejoeng. Ha ka la 9 Phupu 2016 ho ile ha hlaseloa mophatlalatsi oa litaba oa Koranta ea Lesotho Times le Sunday Express Lloyd Motungami-

ri eo kulo e ileng ea ama monoana o ileng oa loke-la ho sebetsoa Setsing sa Bophelo, 'me tsena tsohle kaofela li ama karolo ea ho tlaheha litaba tsa sechaba ka bolokolohi.


President ea Mokhatlo oa Basali Bophatlalatsing 'Marafaele Mohloboli, o supile hore lefu la Macheli le siile sekheo se sehlo kahare ho baphatlalatsi ba basali, kaha e ne e le motho ea ratang mosebetsi oa hae a bile a le matjato. O re batho ba tlamela ho

utloisisa hore motho pele e ba mophatlalatsi ke karolo ea sechaba ka hona ho ka etsahala a ikenye kahara lintho tse ling a sa eelleloe.

O re taba ena ha e'a ba tšoara hantle kaha ba ne ba ntse ba lebeletse tse kholo ka ena, joaloka ho etella mokhatlo pele. O re ketsahalo ena e ba kenyetse letsoalo hobane ba ipotsa na o ne a shebiloe kapa ho tsekoa eng. A phethela ka ho ipiletsa ho Basotho ho emi-

sa ka lithunya, 'me ba bope khotso.

Lelapa la Macheli le tiisitse ho timela ha morali'a lona, 'me Lerato Macheli o re hang h'a bona taba ena marang-rang o ile a potlake-la sepetelele empa a fumana ho se motho ea joalo a fetela sepoleseng se ileng sa netefatsa hore eo Pulane ke mofu. O re lefu lena le ba amme ha bohloko kaha eo a sia bana ba banyenyane haholo.



Makhotla a khutlise seriti sa naha

Nthabeleng Seitlheko

Lekhotla la Kanana ea Basotho (SR) le ntšitse phatlalatsa e supang le tšoenyehile ke lipolao, bosholu ba liphoofole, bobolu, tlala le ho hloka botsitso ka kakaretso, ka la 24 Phupu monongoaha.

Raliphatlalatsa oa SR, Phakiso Moleko o re lekhotala le tšoenyehile haholo ke ka moo lipolao tsa batho li ntseng li e-ja setsi ka teng kahar'a naha. O itse lipolao tsena li kenyeletsa lipolao tsa basali le bana, hoo ho bonahalang sethunya se ja bana ba Basotho nyene le bosiu. A re menyenyetisi e supa hore ke babolai ba letoto la batho, 'me ba bang ba bona ba fuoe beile makhetlo a mangata tlasa maemo a sa utloahaleng.

A bontša hore ba bolaea ka lithunya tse kholo tseo ho tsebahalang hore li tšoaroa ke Litsi tsa Tšireletso, 'me

mehlala ke Khubelu, Fobane, Liphakoeng, Berea, Maseru, Mafeteng le libakeng tse ling.

O re se makatsang ke hore kamehla ba bona mapolesa mebileng, ho pitikisoa batho, feela litlaleho tse tebileng tsa Mautloela a Sesole, Sepolesa le NSS tsona ha li hlalelle.

"Re ne re hopola hore lipolao tsena ho latela moo li seng li le hona teng baokameli ba litsi tsena ba tla sibolla ka botebo batho ba unang molemo mesebetsing ena e soto, 'me toka e ajoe." Ke Moleko eo.

O re ba ipiletsa ke hona ho Tona-Kholo, Letona la Sepolesa, Bookameli ba Litsi

tse Hlometseng ho nka mehato kapa ho itokolla kaha ba hlotsoe ke mosebetsi oo sechaba se o lebeletseng, feela likhafa tsona se li ntša ho tloha ka ngoana leseae.

O itse litlolo tse ling tsa molao tse bonahalang li nyoloha ka sekhahla se sehlo ke bobolu haholo sepoleseng le Lekaleng la tsa

Lehae, ho latela boithuto bo entsoeng ke mokhatlo oa liphuputso.

O re haele mona ho nyehile ha kana Litsing tsa Tšireletso hoo ho bonang le Machaba, ba lakatsa hore 'muso o ke o tlahele sechaba ka mehato e nkoang ho loantša litlolo tsena tsa molao, le hore ba keneng maqujoana a litloli tsa molao, ba hlobole liaparo tseo tsa likhafa tsa sechaba le ho tlohela korone ea Motlotlehi.

Ba re ho bonahala mekhatlo ea likobo e luba sechaba nyene le bosiu, e fiela malapa le ho rinya Basotho joalo ka likokoanyana, ka hona "Re ipiletsa ho Litsi tsa Tšireletso ho sebetsa litaba tsena ka ponaletso le kanete, ka morero oa hore li felle ruri.

SR e re ba okametseng makhotla ba sebeletse ho khutlisa seriti sa ona, likahlolo li akofisoe, 'me batho ba se ke ba fumana beile tse fetang bonngoe haholo tse amang lipolao tsa batho, bosholu ba liphoofole le ho qheketsa matlung.



Mamelang litaelo tsa ngaka-Makhozonke

Nthabeleng Seithleko

Tšebeliso ea litlhare life kapa life e phethahala hantle ha e etsoa ka taelo ea ngaka, ho baleha ho eketsa mafu a sieo 'meleng. Tsena li boletsoe ke setsebi litabeng tsa thuto ea bophelo bo botle, 'Mamonica Mokhe-si Makhozonke, ho hlahisa Setsing sa Kokelo sa Healthdirect Pharmaceutical Solution and Clinic, ka la 23 Phupu monongoaha.

O re batho ba bang ha ba tšoeroe ke hlooho ha ba e ise ngakeng empa motho a noele litlhare tse fetang tekanyo, ebile e le mofuta e fapakaneng ho se phe-toho. O re taba ena e bakela batho mafu hobane ba sebelisa litlhare ho feta tekanyo, tseo ba li rekang ba tsoafa ho bona lingaka.

A re batho ba bang ba reka litlhare tse tšoanang ba sa hlokomela, ho mpa ho fapakaneng mabitso a likampani tse li etsang. O re taba eo e kotsi hobane



motho o bokella setlhare se le seng ka bongata 'meleng oa hae a qetelle a e-na le mafu a sebete, pelo le matšoafo.

A supa hape hore ka linako tse ling hlooho e

supa moo 'mele o nang le bothata teng, ha se hore motho o opeloa ke hlooho hakaalo empa ke karolo ea bohlokoa eo 'mele o qalang ho itšupa ka eona. O re motho o lokela ho ea

setsing ho hlahlobela mafu haholo ha ile a bona hore hlooho e mo tšoara khafetsa e sa phekohe.

A bontša hore motho ha tseba litlhare tseo a li sebelisang ho bohlokoa

hore a tsebe hore na pilisi e joalo e tšetse'ng kahare, ka ho etsa lipatlisiso pele molemong oa bophelo bo botle.

O itse ho na le batho ba nang le phallo e holimo ea mali ba bonahalang ba ithekela litlhare ha ba loke-la ho ea litsing, 'me taba eo e kotsi hobane lefu leo ha le le boemong bo itseng motho o tlameha ho tlohe-la litlhare, ka hoo ho kotsi hore batho ba ithekele litlhare ha li felile.

O bontšitse ha litlhare tse ling li na le 'caffeine' e leng tseo motho a li tloaelang a qetelle a li sebelisa leha a sa li hloke 'meleng oa hae, 'me litlhare tse joalo li ka fetola motho lekhoba la li-thetefatsi.

O re ho bohlokoa hore hang ha motho a ikutloa a e-na le matsatsi a mangata hlooho e sa fole leha a ile a sebelisa litlhare a etele Setsi sa Bophelo. A fana ka keletso ea hore ha ho nepahetse, e le ho qoba ho beha keletso le 'mele tlasa khatello, motho o lokela ho phomola ka nepo, a boele a noe metsi khafetsa.

Healing is more valuable

We go through life carrying a lot of pain from the people we agreed to bring into our lives. Either people we date or those we choose as friends. Most of the time we get hurt when we least expect it, when our trust and hope are highest at all times. The pain mostly stems from our unmatched expectations, the expectations probably not communicated

or not clearly stipulated. We get blinded by our pain and we want those who inflicted us to go through the same pain that we feel. We go on a mission to hurt them, without realising that by being on a mission to hurt them we literally turn into them, they make us change our character and our being, we lose focus on everything; our ambitions, dreams and desires. We are now hell

bound to hurt someone, because after all we are convinced they deserve it. We are not aware that we have lost ourselves in the process, we are missing an appointment with our future. The revenge we so long for will never give us the peace we are looking for. What benefit do we stand to achieve after the revenge? When we are busy looking for a revenge we allow

those who hurt us to have control over our emotions even in their absence, they are still in charge. We give them permission to hurt us every time, we are carrying them with us everywhere we go because we are looking at ways to share our hatred and make them feel it. However, if we make a conscious decision that we aren't going to allow what

happened to change our outlook to life, we would look to find ways to heal, not to give control of our emotions to the situation. Only if we can find the power and magic found in healing we would heal and stay in control. We should never wrestle with the pig in the mud because we will both get dirty while the pig will enjoy it.

Moeletsi oa Basotho
MOELETSI oa BASOTHO

MOELETSI oa BASOTHO

@oaBasotho
WhatsApp +266 680 78
Moeletsi oa Basotho

To advertise with us, please contact:
Tell: (+266) 2835 0466
Email: advertsloeletsiobasotho@gmail.com

1
Sesotho Newspaper in Lesotho



Mokhethoa o lahlehelo ke M100,000

Nthabeleng Seitlheko

Mokhethoa oa Thaba-Bosiu Issac Malebaleba, o re o senyehetsoe ke chelete e kaalo ka M100,000.00 kamor'a hore masimo ao a lemang seahlole le sechaba sa Ha Makhoathi a che. O hlahositse tsena puisanong le Koranta, ka la 23 Phupu monongoaha.

O re litaba tsena tse etsahetseng li se ke tsa bapisoa le mopolotiki ofe kapa ofe kaha tšenyō e bakiloe ke balisana ba neng ba alositse haufi le



masimo. O re balisana ba ne ba besitse mollo, ba

chetsisa poone eaba ka lebaka la moea o monga-

ta lelakabe le ile la tloa 'me mollo oa anela.

O re ho chele liakere tse 10, 'me ho setse tse 'ne. O itsee sena se mo baketse bolutu hobane o tlameha ho phethisa tumellano ea hae le sechaba ea ho se fa poone kaha e se bohlasoa ba beng ba masimo.

O re temong ea selemo se fetileng o atlehile ho fepa sechaba hantle kaha chai e ne e le ea boleng bo hollimo. A re ha joale ho boima kaha a lokela ho tla etsa matsapa ohle ho bona hore sechaba se fumana lijo.

E mong oa baahi ba Ha Makhoathi 'Makelebone Pelea, o supile hore ts'imo e 'ngoe e cheleng ke ea hae, 'me esale a qalile mokhoa ona oa temo, ba fumana lijo empa ha e le mona ho chele ha ba tsebe se tla etsahala. O re tahlehelo ea lijo nakong ena eo naha e tobaneng le phephetso ea tlala ke ntho e bohloko haholo joang ha 'muso o khothaletsa sechaba ho iphepa.

A ipiletsa ho beng ba mehlape ho bua le balisana ba bona ho qoba tšenyō ea mofuta ona kaha ho sia sechaba se se na lijo. A re le 'muso o tle o ba shebe ka mohau hore ba mpe ba fumane seo ba tla se ja.

DMA e ithophela likoluo

Nthabeleng Seitlheko

Mookamele Lefapheng la Thibelo le Taolo ea likoluo (DMA) Reatile Elias, o re Naha ea Lesotho e lokela ho lula e ithophetse maemo a likoluo nako eohle hobane ke qholotso e tobileng linaha tsohle. O boletse tsena, ka la 22 Phupu monongoaha.

O re ho lokela ho be le sehlopha se thehiloeng kahar'a naha sheba-

nang le litaba tsena, ho beha sechaba leseling sebakeng sa boithopho ba sona, ho se thusa ho khetha libaka tse naphetseng sebakeng sa ho aha.

A re linaha tsohle lefatšeng li tobane le maemo a phetoho ea leholimo ho bakang meea e matla, lipula tse ngata le lifefo tse siang malapa a mangata a le tlokotsing. O re litaba tsena li hloka naha e ithophileng ho baleha hara tse ling sechaba se hlohang bolulo ka lebaka la khaello ea tsebo.

O supile ha sehlopha se tla thehoa se tla seb-

etsa ka thata 'moho le sechaba metseng ka likomitjana tsa metseng ho bona hore bohle ba lula ba ithophetse maemo ana le ho tseba hore litaba tsa likoluo li tlahoia ke mang, hokae e le ho baleha tšubuhlellano e bang ofising tsa bona.

'Mamonyaku Koloti ea shebaneng le morero ona ho hlaha DMA, o hlahositse hore ba ile ba qholotsoa ke hore nakong ea COVID-19 ba ne ba sa ithlopha haholo Makhotleng a Puso ea Libaka a Litoropo kaha e leng moo sechaba se khobokanang ka bongata.

O re ba tl'o sebeletsa ho bona hore sechaba se phelang literopong se sireletsehile nakong ea litlokotsi, hape leha ho fanoa ka lijo ho fenyala tlala batho ba tsebane metseng ea bona e le hore ba fumantšoe khahlametso ha bobebe. A bontša bohlokoa ba ho tšehetsana metseng le ho thusana moo ho hlokalang.

O re mathata a mahollo literopong ke ho raloa ha tsona hampe, joale metse le eona e behiloe libakeng tse kotsi joaloka mekhoabong le pel'a mafika.

A re ha joale ba se ba ralile mekhoea eo ba tl'o e sebelisa ho bua le sechaba metseng le literopong, har'a e meng ke ho theha likomitjana metseng tse tla koetlisoa mabapi le maemo ana, ba boele ba tšoarele marena, makanselara, sechaba le baithuti likolong lipitso. H'a phethela o itse ba lakatsa ho bona Basotho bohle ba utloisisa hantle ka litaba tsa tlokotsi.

Morero ona o tla kena tšebetsong literekeng tsa Leribe, Maseru, Butha-Buthe le Mafeteng hobane ke literopong tseo ho phelang lichaba tse ngata tse fapakaneng. Libakeng tsena ho na le mathata a tlišoang ke ho khobana ha sechaba ka lebaka la mesebetsi.



Ho hloka tsebo ho bohloko

Nthabeleng Seitlheko

Mookameli Lefapheng la Liphuputso Mokhatlong o Ikemetseng oa Liphuputso (Afro-Barometer) Libuseng Malephane, o re batho ba sa rutehang ba hlahella kaholimo-limo ba le tlokotsing ea ho iphumana e le mahlatsipa a thekisetano ea batho kaha ba se na litsebo tse phethahetseng. O boletse tsena puisanong le Koranta ka la 24 Phupu monongoaha.

O re selemo le selemo mokhatlo oa habo o etsa liphuputso ka litaba tse fapakaneng, 'me ha joale ba phatlalatsa boithuto ba bona bo ileng ba ba ka khoeli ea Tlhakubele ngoahola, mabapi le litaba tsa thekisetano ea batho. O itse ba fumane hore bohloko ba batho ba tsebang ka litaba tsa thekisetano ea batho, ke ba phelang literopong ha ka maloting e le bothata.

A re ba ntša phatlalatsa ba ipapisitse haholo le ketekelo ea Letsatsi la Lefatše la Thekisetano ea Batho le ketekoang ka la 30 Phupu selemo le selemo. A bontša hore ka liphuputso tsena ba khothaletsa maano a tla thusa hore ho fihleloe tharollo bothateng bona.

O re ba fumane hore ho fihlela ha joale ke mokhatlo o le mong o tšorereng ka thata toantšong ea litaba tsa thekisetano ea batho, 'me linyeoe tsa litaba tsena li bonahala li sisintha ka makhohleng.

O khothalelitse Naha ea Lesotho ho sebetsa ka thata ho anetsa thuto mabapi le litaba tsena, ka lebaka leo marena le makanselara a nke karo-lo ka hore ho hlake ha motho a batletsoe mosebetsi hore na o ile hokae, o tsamaile le mang.

Ho sa le joalo, tlaleho ea liphuputso e phatlalal-



itsoenng ke mokhatlo ona, ka la 24 Phupu monongoaha, e supa ha thuto

ka litaba tsena e pharetse ho barutehi le batho ba literopong. Ke 60%

ea Basotho ba phelang mabalane ba tsebang ka litaba tsena ha 39% e

le batho ba phelang ka maloting, ha 73% e le batho ba reng ha ba es'otloe ka litaba tsena, 'me 49% ea bona e le ka mabalane. Bonyane 65% ea Basotho e re Litsitisa Tšireletso li lokela ho sebetsana le taba ena, 28% e re ebe sechaba senkang boikarabello, 2% e re marena le makhanselara a nke boikarabello ho thibela taba ena kahar'a metse ea bona le 3% e re bahoebi ba lokela ho sebetsana le taba ena ka matla.

Ho latela phatlalatsa ena, banna ke 65% e tsebang ka litaba tsena, basali 62%, batho ba phelang literopong 73%, ka lithabeng 49%, ba sa rutehang 23% baithuti ba Likolo tsa Mathomo 50%, ba Thuto e Bohareng 50%.

Ha ho ngoan'e motle Afrika Boroa

Nthabeleng Seitlheko

Mothehi oa Mokhatlo oa Basebetsi ba ka ntle ho naha le ba sebetsang libakeng tseo e seng tsa habo bona Lerato Nkhetše, o re 'Muso oa Lesotho o lokela ho lula khafetsa o lokisa litaba le naha ea baehelani hore Basotho ba be le bolokolohi ba ho phela naheng eo. O boletse tsena puisanong le Koranta ka la 24 Phupu monongoaha.

O supile a tšoenyehile ke litlaleho tse etsoang ke puso tsa hore Basotho ba phelang naheng eo ba se na litokomane tsa boitsibiso ba tl'o lelekoa. O re 'muso o tlameha ho nkela taba ena khato e potlakileng hobane bohloko ba Basotho ba fumana mesebetsi naheng eo. A re ha joale e ntse e le bothata hore Basotho ba fumane mangolo a ba lumellang ho sebetsa, a ho kena sekolo le a fang Basotho ba seng ba nyetsoe naheng eo tumello ea bolulo.

O re e le mokhatlo ba beha Basotho leseling ka litaba tsena hore ba tsebe hore batho bohle ba Afrika Boroa eseng ka molao ba tl'o phahloa. A re ho se ho e-na le Basotho ba bang ba seng ba tšoeroe, ba bang ba tinngoe le mokhoa oa ho itefella beile.

O re ba rata ho bona Naha ea Lesotho e ba le lipuisano le ea Afrika Boroa ho seng joalo Basotho ba tl'o kena chocho-long. A re ho lokela linaha

tsena ka bobeli li be le lipuisano ebe ho akofisoa phano ea lits'ebeletso kahar'a naha le ea Afrika Boroa hore Basotho ba sireletsehe.

A bontša hore Basotho ba phela mahlomoleng hobane ba lula ba phalalisoa nako le nako ka lebaka la tlhokahalo ea mesebetsi kahara' naha ea habo bona. A re ba rata ho bona Tona-Kholo a khutlisetsa Basotho hae hobane a hlahisitse mesebetsi ho latela tšepi-

so ea hae.

H'a phethela o re naha e ratang sechaba sa eona, e potlakela ho etsa maano a se sireletsang. A re mesebetsi e meholo eona e ntse e itsoellapele empa sechaba sona se tlokotsing e leng ntho e bohloko hobane ha batho ba bangata ba hloka mesebetsi ho ameha moruo, kholo ea naha, ebe tahlehelo ea bophelo le liketsahalo tse bolutu naheng e joalo lia iponahatsa.





MoB KIDD'S

EDUTAINMENT

Puzzle MoB 92-4536


TLOTLONTSOE

M O E L E T S I O A B A S O T H O H C E
 O H B S C R C W X L E M E G Y Q D N O C
 W W L Q D A H O P U B L I S H I N G R I
 E G C B A D O R U L N J K M A W O B P N
 S J H B A I O K F S T N A A Y Q G O O D
 A E U Q D T L J T S H I R T S R R O R U
 V V R N V I B A E Z P G A J H Q A K A S
 O J C Z E O O C B I A O P W V K P S T T
 S L H N R N O K M R C A R E L Q H R E R
 B A B S T A K E M F E R I D S A I E W I
 I M O C I L S T E Y S R N D D K C P E A
 N I O H S W P H K A E F T I S Z D A A L
 D N K O I E C T Q G T G I N V L E I R U
 I A S O N D Z F I P T B N G F B S R J N
 N T K L G D J L V J E G G D F M I R J I
 G I L W R I C S I N R M Y E I C G A R F
 E N G E A N T F U Z S M N C S H N S G O
 O G P A T G Y P H O T O C O P Y I N G R
 V E M R E S T A T I O N E R Y R W N Z M
 C H R I S T I A N W E A R S Z B H G W S

- Advertising Rates**
- Binding**
- Books repair**
- Chef Coat**
- Christian wear**
- Church books**
- Corporate wear**
- Graphic design**
- Industrial Uniforms**
- Laminating**
- Moeletsi oa Basotho**
- Pace setters**
- Photocopying**
- Printing**
- Publishing**
- School books**

- School wear**
- Skirts**
- Stationery**
- Traditional wedding**
- T-shirts**
- Wedding decor**
- Work Jacket**

SOLUTIONS: MoB92-4534





TSA KEREKE

Bophelo bo teng

Staff

Kopano ea Bana ba Maria Parishing ea Mofumahali oa Lefatše e hlalositse Komiti e ncha e nang le likhoeli tse peli e kene tšebetsong ka la 21 Phupu monongoaha, Ma-zenod.

Mookameli e mocha o bontšitse a khotetse haholo hobane litho tse neng li se li tsamaela

tsa kereke e leng se neng se sa etsahale. O supile hape hore ba ile ba ba le bakokoti ba bane ba seng ba apesitsoe, 'me ha joale ba na le bararo ka hona kopano e'a hola.

Ka lehlakoreng Motsamai oa Kopano o itse qholotso e kholo eo a kopanang le eona ke litho tse bonahalang li sa mamele le ho latela litšoanelo tsa tsona. Moqebelo

sa 'Missa ebe kamor'a sona ba rapela, empa tsena tsohle o re litho li li furaletse.

Litho tsa Komiti; Mookameli ke Seithati Sylvia Tlabali, Motlatsi oa hae ke Likopo Lydia Lechela, Mongoli ke Motšelisi Marcelline Maiketso, Motlatsi oa hae ke Tšepiso Agnes Lebitsa, 'Mamatlotlo ke 'Mampeli Adolphine Le-



hole le kopano li khutlile ho phetha litšoanelo. Ho feta moo kopano e se e nka karolo litšebelatsong

oa pele oa khoeli ke o khethetsoeng Kopano ea Bana ba Maria ho tla Senhlabelong se Halalelang

saoana ebe Litho baeletsi ke Rearabetsoe Vivian Mahloko le Lineo Josephine Makate.



2023-2024 SELEMO B SONTAHA SA 17 HAR'A SELEMO

Likhosi 4,42-44

Pesalema 144

Ba-Efese 4,1-6

Joannes 6,1-15



Khothatso

Kopanong le Moea o Halalelang

Thutong ea Pele (2 Likhosi 4:42-44) monna o tlisa litholoana tsa pele tsa kotulo ea hae kapel'a Elisha mohlanka Morena, 'me sena o se etsa mabapi le taelo ea Morena ka lentsoe la Moshe. (Exoda 23:19) Ka ho ba ntho e le 'ngoe Moeeng oa Morena Elisha a laela hore lijo tseo ho feptjoe batho ka tsona. Mohlanka ha utloa sena a botsa hore na makholo-khoho ao a batho a ka feptjoa joang ka lijo tse nyane hakaalo. Elisha ka ho tšepa Morena a boela a ntša taelo, "Li feng batho 'me ba je hobane ke sena seo Morena a se bolelang, 'Ba tla ja ho be ho sale.'" Eaba mohlanka o phethahatsa ka moo a laetsoeng ka teng.

Mantsoe ao a Morena a hore 'ba tla ja ho be ho sale tse ling' a bontša seo Morena Jesu Kriste a neng a tla se etsa mohla a tlang; ho fepa bohle ba lapileng 'meleng le moeeng. Ka ketso eno ea monna ea tlisitseng litholoana tsa pele tsa kotulo ea hae, Elisha, mohlanka 'moho le sechaba se ileng sa ja, bohle le bona hore sechaba se ne se tseba Morena se bile se mo mamela. Le boetse le bona lerato, sechaba sea hlokomelana 'me sena se tlisa thabo le khotso. E le letšoao le bontšang hore Morena o ne a e-na le likamano tse ntle le sechaba sa hae, litholoana tseo li ile tsa eketseha 'me bohle ba ja ba khora.

Thuto ea Bobeli e etsa thapeli ho bohle ho phela bophelo bo arabelang pitso ea e mong le e mong oa lona ka boikokobetso, mamelo, bonolo le ho mamellana hohle le ho boloka kopano ea Moea molemong oa khotso. Joaloka Paulosi ea inkang e le motšoaruo oa Morena, le lona ka lebaka la tlhatsuo le entse tšepiso e le tlamang ho se etse ka moo le ratang ka teng. E le ho leboha Morena ka grasia ea hae le bilelitsoe ho phela tumelo ea lona ho Kriste le le ntho e le 'ngoe ka Moea oa Morena.

Joaloka Makatholike ana le na le khetho ea ho se mamele Morena ka ho etsa tsohle tse khahlanong le thuto ea hae? Khetho le na le eona empa ha le na tokelo ea ho se mamele Morena Molimo hobane le batšoaruo ba hae ba nang le mokitlane ka lebaka la pholoho ea lona.

Evangeling le utloa ka ngatafalo ea mahobe le tlhapi tse neng li e-tsoa ho mohlankana, eaba Kriste oa li ngatafatsa. Barutua ba ile ba mamela Kriste, eaba ba laela batho ho lula ka lihlotšoana 'me bohle ba ileng ba mamela ba ile ba feptjoa, ba amohela grasia ea Morena ka ho ngatafala ha mahobe. Mangolo a Halalelang ha ho moo a le bolellang ka hore na ba ileng ba se ke ba mamela ho ile ha etsahala'ng ka bona. Empa a bolela ka ba ileng ba mamela 'me ba feptjoa, ba e-ja ba khora.

Bana be'so kopano ea rona ka Moea e re thusa ho beha litholoana tsa thabo le khotso, re boela hape re hola bo-mong bo re isang kholong ea 'Mele oa Kriste e leng Kereke. Ka hona boinahanong ba rona ba beke ena ha re ipotseng hore na re fela re tšepahalla Kriste, Kereke le babishopo ba rona. Ha re elelloe botho ba rona bo nang le likohlano le ba bokriste e le hore re tsebe ho amohela tseo e leng tsa moea.

Bahalaleli har'a Beke

- 29 Phupu Martha
- 30 Phupu Peter Chrysologus
- 31 Phupu Ignatius Loyola
- 1 Phato Alphonsus Marie Liguori
- 2 Phato Eusebius of Vercelli
- 3 Phato Lydia Purpuraria

Basketball e hola ka potlako



Sepheo e ntse e le ho otlana bana le ho ba kenya moea oa lerato la papali." A rialo.

A re ha e le mona ba se ba e-na le mekhahlelo ea batho ba baholo ka lilemo tse fapakaneng e ntseng e hola ka katleho e kholo, ba boetse ba shebile ho ba le mokhahlelo oa ho qetela o bitsoang Mini League Basketball, bakeng sa bana ba U12 ho isa ho U18. A supa hore mafelong ana a beke lipapali tsa Liki li tlii'o khefut-sa kaha ba tla be ba tsoere Litlholisano tsa Mariha tsa matsatsi a mabeli.

A tiisa hore kholo e teng ea papali ena, le hoja ba ntse ba se na botšehetsi ba lipapali tsena. A re sepheo sa bona se sehlo ke hore litsiane tseo ba tlang ho li fumana ho tsoa ho Komisi ea Lipapali le Boithapallo(LSRC), ba tlii'o li sebelisa haholo bakeng sa ho otlana bana papaling ena. "Ke hona moo hara e meng ea meralo ea rona re shebileng ho tla holisa papali ena ka ho otlolla thupa e sa le metsi." Ke Molupe eo. A ipiletsa ho bafani ho etsa letsoho la monna molemong oa kholo ea papali.

Tšeliso Thakholi

Papali ea Basketball e hlaloso ke President ea Mokhatlo oa Lesotho oa Papali ea Basketball(LBA), Monghali Molupe Ratšolo e bonahala e hola ka potlako e kholo kamor'a

nako e ka etsang selemo feela ba fuoe boikarabello ba ho e alosa.

Sena Ratšolo o se hlalositse kamor'a lipapali tsa mokhahlelo oa bobeli oa Liki e Kholo, tse neng li bapala Ha Ratjomose, Maseru ka la 20 Phupu 2024, moo Sharks e hlahang maemong a bone liking ea basali e

ileng ea makatsa ba bangata ha e ne e teteka Dolphins e li hulang pele lokong ka 33-31. Athe Alumni e ile ea khakhatha ntle le qenehelo Razz ka 76-25.

A re o khotsofetse haholo ke 'mapalo o tsoileng matsoho le kholo, eo ba nang le eona mekhahlelong e mero ea papali ena, e leng

Mokhahlelo oa Liki ea Basali, oa Corporate moo e leng oa likamphani le oa Bana(Senior Men). "Re boetse re ntse re e-na le Mokhahlelo oa Likolo tse Phahameng oo re o bapalang ka linako tse itseng hobane bona e le barutoana. Ka Phato re na le morero oa ho tla ba ba tsoarela litlholisano.

Lesotho le emetsoe



Monghali Mckirdy tikolohong ea Phoenix, Linaheng tse Kopaneng tsa Amerika(USA). Mokulubete Makatisi le eena o tla emela naha mabelong a bolelele ba 21km. O ile a etsa nalane ngoahola lekhetlo la pele ka ho tloa nako e neng e behiloe bakeng sa Li-Olympic ka 01:09:45. Eena e sa le a itokisetsa lipapali tsena a ntse a ikoetlisetsa Naheng ea Afrika Boroa.



Tšeliso Thakholi

Nakong ena eo ho setseng matsatsi a se makae, pele ho lipapali tsa Lefatše tsa Li-Olympic, sechaba sa Basotho se behile tšepo e kholo ho libapali tse tharo tse tlii'o emela naha lipapaling tsena, mefuteng e fapakaneng ea lipapali e leng Tebello Ramakongoana, Michelle Tau le Mokulubete Makatisi.

Lipapaling tsena tsa Paris Olympic Games 2024, tse tlii'o thakhoha ka la 26 Phupu ho isa la 11 Pha-

to monongoaha, Michelle Tau o il'o emela Naha ea Lesotho papaling ea Taekwondo. Tau ke mosali oa boraro kahar'a basali ba tikoloho ea Afrika ba ipabolang ka papali ena. O boetse o hlaha boemong ba bo-26 lethathamong la libapali tsa Li-Olympic. E le ho itokisetsa lipapali tsena ka tsela e phahameng haholo, o tlasa bokoetlisi bo matla ba Monghali Hugo Tartora Naheng ea Spain.

Haele Tebello Ramakongoana o tlii'o emela naha lipapaling tsa mabelo a malelele a 42.1km. Hajoale o ntse a le tlasa leihlo le nchocho la bokoetlisi ba

Sechaba sa Basotho sa barati ba lipapali se tho-



holelitse le ho lakaletsa libapali tsena katleho le mahlohonolo, lipapaling tse boima tseo li tlang li li lebile. Sa re tšepo le toro ea sona ea ho ba tlela limentlele tsa khauta, e mahetleng a tsona. Ba thoholetsa bohle ba kentseng letsoho ho bona hore libapali tsena li fumana likoetliso tsa boemo bo holi-mo ba machaba.

Ke libapali tse fetang 10,000 tse tsoang linaheng tse 200 tse tlang ho qothisana lehlokoa lipapaling tse 32 tse fapakaneng. Lipapali tsena li tlii'o buloa ka molao ka menyakoe le lipapali tse kang tsa Gymnastics, Taekwondo le lipina.

O beha meja fatše



Raliphatlalatso ea sa tsoa beha meja fatše, Bokang Phasumane

Tšeliso Thakholi

Qhoku litabeng tsa raliphatlalatso lihlo-pheng tsa bolo ea maoto, Monghali Bokang Phasumane o behile meja fatše mosebetsing oa ho ba Raliphatlalatso oa Komiti e Kholo e Tsamaisang Bolo ea Maoto(PLMC).

Ho ea ka Phasumane qeto ena eo a e nkileng o re ke ka lebaka la hobane a se a holile, 'me a ikutloa a khathetse

kaha a sebelitse nako e telele bolong ea maoto e le raliphatlalatso. O re o ile a qala pele ka ho itokolla sehlopheng seo a neng a ntse a sebetsa ho sona sa Linare kaha a kene kahare ho PLMC ka lebaka la sona. Hamorao ke ha a tlangolla PLMC lengolo la ho itokolla.

A hlakisa hore Sehlopheng sa Linare le PLMC o sebelitse ka mofuthu ho se liqabang tsa letho. "Ke tsamaea tjena re ntse re utloana, ke hore feela ke mpe ke emelle ka thoko, ke sebelitse kannete papaling ea

bolo ea maoto. Ke kopa hore nke ke il' o phomola." Ke Phasumane eo.

H'a bolela tsa katleho ea hae lihlopheng tse kholo o boletse hore ke lerato la mosebetsi, ho etsa mosebetsi ka boitelo, lerato la papali ea bolo ea maoto, boitsoaro bo botle le mamello e leng tsona mokokotlo oa katleho ea hae.

Phasumane ea nang le lilemo tse ngata haholo a sebetsa lihlopheng tsa bolo ea maoto e le raliphatlalatso, o lokolisitse pale ea bophelo ba hae mosebetsing oa ho

ba raliphatlalatso ho tloha ka selemo sa 2010 h'a ne a qala ho sebetsa sehlopheng sa Lioli le mofu Moeketsi Pitso. Hamorao a fetela sehlopheng se ileng sa tuma haholo ka papali ea sona e tsoileng matsoho sa FC Likhopo.

Ho tloha moo ea e-ba raliphatlalatso oa sehlopha se sehlo kahar'a naha sa Bantu, 'me a sebetsa ka bokhabane bo boholo. Mosebetsi oa hae o motle o ile oa khahla sehlopha sa mehleng sa Sandawana, se ileng sa mo amoha Makaota, empa Bantu ea boela ea mo

lata hape. Athe o khutlela ho Bantu joalo, sehlopha sa Linare se ne se ntse se shebile makhabane le boiphihlelo ba hae le sona sa mo nka ho fihlela a ba a khetheloa ho ba raliphatlalatso oa PLMC.

Phasumane o lebohile monyetla oo a ileng a o fuoa oa ho bontša talenta ea hae. A leboha le bohle bao a sebelitseng le bona ba neng ba mo fa letsoho kahare ka mehla. "Le lona baphatlalatsi ka ho fapakana ha lona kea le rata kaofela 'me kea le leboha." Phasumane eo.

E khetha boetapele

Tšeliso Thakholi

Mongoli e mocha oa Mokhatlo oa Lesotho oa Bakoetlisi(LCA), Monghali Teele Ntšonyana o re har'a e meng ea mesebetsi ea mokhatlo ke ho bona hore bakoetlisi ha ba sebetsa tlasa khatello e matla ea ho lula ba tlama thoto ka linako tsohle e le ha ba se ba lelekuoe kaha ba le bohlokoa papaling ea bolo ea maoto, hobane ba hlaha bobeling ba boemong ba pele e le libapali.

Litaba tse na Ntšonyana o li buile ka 'Mantaha kamor'a ho likhetho tsa komiti e ncha. O re har'a tse ling tsa lintho tseo ba tliil'o sebetsana le tsona haholo ke paballo le tlhokomelo ea bakoetlisi kaha ba etsa mosebetsi o moholo haholo. "Re lokela ho bona hore ha ho na eng kapa

eng e kotsi e ka hlahelang mokoetlisi, e le hore bophelo ba hae bo sireletsehe." A rialo a bile a eketsa ka hore ntho ea mantlha ke bophelo bo botle ba bona.

A re ha mokoetlisi a koetlisa sehlopha eba se papali se hlajoa ntlha khahlanong le sehlopha seo a se koetlisang, mokoetlisi ea joalo o molato ho sa shejoa le mabaka a entseng hore ntlha e joalo e kene. "Re tliil'o leka ho bona hore na re thusa bakoetlisi joang litabeng tsa mofuta o kang ona. Hoba likarolo tse na tse peli li bohlokoa, 'me ha li le sio ha ho na papali ea bolo ho hang." O boletse joalo.

A qetella ka hore se ba thabisitseng haholo ka komiti ena e ncha, ke hore e na le boemeli ba bakoetlisi ba mafapha ohle a tsamaisang papali ea bolo ea maoto le boemeli ba litereke tse leshome tsa naha. A etsa

mohlala ka boemeli ba bolo ea basali, boemeli ba bakoetlisi ba bana ho tloha lilemong tse tlaase le bahokahanyi ba litereke. A re sena se tliil'o thusa ho nolofatsa mosebetsi kaha ho tla ba le neheletsano e ntle ea mosebetsi.

Komiti ena e ncha e tliilo nka nako ea lilemo tse tharo e eme tjena:

Molula-Setulo e mocha ke Letlatsa Mantsoe, Motlatsi oa hae ke Caswell Thibinyane, Mongoli ke Teele Ntšonyana, Motlatsi oa hae ke Lesoma Tlhomola bao bobeli ba sa kang ba fumana batho ba ba qholotsang litulong tseo ba neng ba iketela tsona. Raliphatlalatso ke Thabang Pelea, Ramatlotlo ke Bahlakoana Mohoanyane, Litho-Tlatsetso ke 'Maneo Nte-pelle le Lehlohonolo Masupha. Litho tse neng li khethoa tsa komiti e kholo li ne li le robe-



li. Ba bararo ba ile ba hloka ema ba le bang litulong tseo ba baphephetsi ba bona, 'me ba neng ba iketetse tsona.

U phathahantsoe ke'ng?

Bophelo 'meleng; Motho e mong le e mong o phela nameng, 'me khaho ea 'mele ke boikhethelo ba motho ka mong. Ke ka lebaka lena batho ba shebahala ba sa tsoane; lilemo, seemo, lebala, boima, joalo-joalo. Leha 'mele ea batho e fapakana ka chebahalo joalo, litlhoko tsa eona tsona lia ts'oa-na. Batho ba bang ba na le ho nyelisa ba bang ka tsela eo ba shebahalang ka eona, empa ba sa lemohe hore le bona chebahalo ea 'mele ea bona ke boemo bo ka fetohang neng le neng. Mang le mang ea phel-

ang o monyetleng oa ho shebahala ka tsela e 'ngoe e fapakaneng le ea kajeno. Setho ka seng sa 'mele se na le mosebetsi oa sona.

'Mele e hloka moea oa phefumoloho, o finyellang lithong tsohle tsa 'mele ha ho nepahetse, oo bophelo ha bo tloaelehile o sa rekoeng. Oona 'mele oo o hloka lijo, metsi a ho noa le ho hlapa, bolulo, litlolo le lisebelisoa tse ling. Lintho tse-na tse hlokoang ke 'mele lia sebeletsoa hore li fumanehe. Na u phathahantsoe ke bophelo ba 'mele?

Bophelo kelellong: Kelello le eona ka ho tsoana le 'mele e hloka ho otloa, ho tloha motho a sa le monyenyanane e matla-

fatsoa ka ho rutoa lintho butle-butle holatela nako ea hae. H'a ntse a hola o ea sekolong ka sona sepheo sa ho holisa Kelello ea hae, ka hona se bohlokoa kholisong ea kelello ea motho. Ke lebaka lena thuto e leng tokelo ea mantlha ea botho, eo motsoali e mong le e mong a tlangoang ke molao ho e phethahatsa baneng ba hae e le boikarabelo ba hae. Hape thuto ha e tsofalloe, batho ba ithuta ntho e ncha hore ba 'ne ba matlafale kelellong. Ha motho a ntse a ithuta le boleng ba hae boa hola. Na u phathahantsoe ke bophelo ba kelello?

Bophelo moeeng: Motho e mong le e mong o na le bophelo moeeng, moea oa rona

o phela kahare ho 'mele ea rona. Moea le oona oa feptjoa tumelong, ke lebaka lena batho ba tla ea likerekeng, sepheo ke ho holisa tsebo litabeng tsa bona tsa semoea. Batho ka litumelo tsa bona tse fapakaneng ba itokisetsa ho ea fepa moea oa bona ka matsatsi a hloahiloeng hore ba be hammoho ho matlafatsa tumelo. Na u phathahantsoe ke bophelo ba moea?

Bophelo maikutlong: Batho bohle ba na le maikutlo, maikutlo ana a angoa ke lietsahala tsa letsatsi ka leng likamanong lipakeng tsa motho le motho kapa batho ba mo potopotileng. Ekaba malapeng, likolong, mesebetsing, likerekeng joalo-joalo. Maikutlo le

oona a hlokomeloa, a matlafatsoe. Na u phathahantsoe ke bophelo ba maikutlo?

Motho h'a lokele ho phathahantsoe ke e le 'ngoe ea tse boletsoeng kaholimo, bone ba tsona li etsa bophelo ba motho hore bo phethahale, bo otlohe, ka hona bohle re lokela ho tsitsisa lintlha tse-na bone ba tsona. Re li ele hloko hore re tsebe ho lemoha kapele ha bothata bo le teng, hore re se 'na re oka nama empa ho kula maikutlo. 'Me le bana litaba tse-na li ba ama ka kotloloho joalo ka batho ba baholo. Le bona re lokela ho ba thusa ho itemoha le ho ithokomela ba sa le lilemong tse tlaase.

Puseletso Moeti; Mother's Touch

ELEGANCE COUTURE



FABRIC THAT SPEAKS

ELEGANCE COUTURE

CONGRATULATES ALL GRADUANDS OF 2024.
MAY GOD SHINE HIS LIGHT UPON YOUR WAYS
AND POUR HIS BLESSINGS UPON YOU ALL.
REMEMBER TO GET YOUR FULL GRADUATION
REGALIA FROM US AS WELL AS YOUR DESIRED
OUTFIT AT LOW PRICES.

50% OFF

UNTIL AUGUST 2024

(ALL COLLECTIONS)



PHYSICAL ADDRESS:
TRADORETTE BUILDING ROOM B22

WHATSAPP: +266 58524642
FACEBOOK AS ELEGANCE COUTURE
INSTAGRAM AS ELEGANCE COUTURE

